

Aralin 4

ANG ESPIRITU SANTO AY UMAAKAY SA IYO

Sa Araling Ito'y Pag-aaralan Mo

- ✠ May Kaibigan Ka Na Aakay Sa Iyo
- ✠ Inaakay Ka Sa Pamamagitan Ng Salita Ng Dios
- ✠ Inaakay Ka Sa Pamamagitan Ng Iglesya
- ✠ Inaakay Ka Sa Pamamagitan Ng Mga Kaloob Na Espirituwal
- ✠ Inaakay Ka Sa Pamamagitan Ng Mga Pangitain At Mga Panaginip
- ✠ Inaakay Ka Sa Pamamagitan Ng Mga Pangyayari At Mga Paniniwala

MAY KAIBIGAN KA NA AAKAY SA IYO

Ilang ulit mo nang naitanong sa iyong mga kaibigan, "ano ang dapat kong gawin, sa palagay mo?" Ang iba nama'y umaasa sa mga manghuhula. Nguni't may Isa



na iyong maasahan higit kanino man. Ikaw ay may Isang Kaibigan na nakababatid sa hinaharap. Alam Niya ang pinakamabuti para sa iyo. Siya ay nagmamahal sa iyo at nagnanais na akayin ka sa lahat ng dapat mong pagpasiyahan. Siya ay ang Espiritu Santo, ang iyong Matulunging Kaibigan.



Galacia 5:16, 25. "Magsilakad kayo ayon sa Espiritu, at hindi ninyo gagawin ang mga pita ng laman. Kung tayo'y nangabubuhay sa pamamagitan ng Espiritu, ay mangagsilakad naman tayo ayon sa Espiritu."

Gawin Mo Ito

1. Isaulo ang Galacia 5:16, 25.
2. Isaulo ang mga paraan ng pag-aakay ng Espiritu, gaya ng nasasaad sa "Sa Araling Ito'y Pag-aaralan Mo."

INAAKAY KA SA PAMAMAGITAN NG SALITA NG DIOS



Ang Biblia ay mapa na daraanang ginagamit ng Espiritu Santo upang akayin ka sa Langit. Tinutulungan ka Niya bawa't araw upang iangkop sa kalagayan mo ang

itinuturo ng Salita ng Dios. Kaya nga, mahalagang basahin mo ang Biblia araw-araw.

Kung minsá'y mangungusap sa iyo ang Espiritu Santo sa pamamagitan ng ilang talatang nabasa mo. Karaniwan nang patotoo ng mga Cristiano: "May suliranin ako at di ko alam ang gagawin. Sa pagbabasa ko ng isang talata sa Biblia, waring umangat ito sa pahina, upang tumugon at lumutas sa suliranin ko."

Kapag isinasaulo mo ang mga talata sa Biblia, nagiging madali para sa Espiritu na akayin ka. Kung natutukso kang gumawa ng di tama, maaaring gumuhit sa isip mo ang isang talata, hudyat na ikaw'y tumigil. "Nakikita Mo ako, Oh Dios!" Ito'y ipinagunita ng Espiritu Santo sa maraming Cristianong muntik nang mahulog sa tukso.



Awit 119:9. "Paano lalinisin ng isang binata ang kanyang daan? Sa pagdinig doon ayon sa Iyong salita."

Mangungusap din sa iyo ang Espiritu Santo sa pamamagitan ng pagtuturo ng Biblia. Maaaring ito'y sa pangangaral sa iglesya, radyo, samahan sa Biblia, sa babasahing Cristiano, at sa pag-aaral tulad nito. Pinili Niyang gamitin ang mga paraang ito upang



akayin ka sa lubos na katotohanan. Tandaan ang Juan 16:13.

Gawin Mo Ito

3. Sambitin ang Juan 16:13.
4. Isaulo ang Awit 119:9.
5. Gumuhit na ba sa isip mo ang isang talata sa Biblia at naging tulong sa dapat mong gawin?


6. Isinasaulo mo ba ang lahat ng talatang ipinasasaulo sa iyo sa kursong ito? _____
7. Paano mo inaasahang tutulong sa iyo ang mga talatang ito? _____

INAAKAY KA SA PAMAMAGITAN NG IGLESYA

Paano natututong lumakad, magsalita, tumakbo, maglaro, at gumawa ang isang bata? Sa pamamagitan ng kanyang pamilya! Ang ama, ina, at mga kapatid ay nagtuturong lahat sa bata ng dapat nitong gawin at kung paano gagawin ang isang bagay.

Nang ikaw'y ipanganak na muli, ginawa kang kaanib ng pamilya ng Dios -- ang iglesya ng Panginoong Jesu-Cristo. Inaasahan ng Espiritu na tatanggapin mo ang tulong ng iyong mga kapatid kay Cristo. Malaking tulong ang kakamtin mo kapag umanib ka sa isang iglesyang lokal. Tiyakin mo lamang na ito'y iglesyang nananalig sa Biblia, sumusunod sa Salita ng Dios, kumikilala at nagtuturo tungkol sa gawain ng Espiritu Santo.

Naglagay si Cristo ng mga pastor, guro, at iba pang tagapanguna sa iglesya. Binibigyan sila ng Espiritu Santo ng mga natatanging kaloob at kapangyarihan upang magampanang mabuti ang kanilang gawain.

 Efeso 4:12. "Sa ikasasakdal ng mga banal, sa gawaing paglilingkod sa ikatitibay ng katawan ni Cristo."

Dapat maging puspos ng Espiritu Santo ang bawa't kaanib ng iglesya. Kapag inaakay ng Espiritu Santo ang mga kaanib at mga tagapanguna, nagkakaisang gumagawa ang buong iglesya. Bawa't isa'y gaganap ng kanyang bahagi sa panukala ng Dios.

Gawin Mo Ito

8. Kaanib ka ba ng isang iglesya lokal? _____
Anong denominasyon? _____


9. Ano ang gawain mo sa inyong iglesya?

10. Idalangin mo ang inyong pastor at ibang tagapanguna sa iglesya upang patuloy silang mangapuspos ng Espiritu Santo.

INAAKAY KA SA PAMAMAGITAN NG MGA KALOOB NA ESPIRITUWAL



Ang Espiritu Santo ay may mga kaloob para sa bawa't Cristiano. Ibig Niyang tanggapin natin ang mga kaloob na ito upang matulungan natin ang iba.

 1 Corinto 12:4, 7. "May iba't ibang mga kaloob, datapuwa't iisang Espiritu. Datapuwa't sa bawa't isa ay ibinibigay ang pagpapahayag ng Espiritu upang pakinabangan naman."

Nabasa mo ang tungkol sa mga kaloob na pananampalataya, paggawa ng mga himala, at pagpapagaling. Narito ang iba pang kamanghamanghang kaloob ng Espiritu:



1 Corinto 12:8, 10. *"Sapagka't sa isa, sa pamamagitan ng Espiritu ay ibinibigay ang salita ng karunungan; at sa iba'y ang salita ng kaalaman ayon din sa Espiritu ... sa iba'y hula; at sa iba'y ang pagkilala sa mga espiritu; at sa iba'y ang iba't ibang wika; at sa iba'y ang pagpapaliwanag ng mga wika."*

Maaaring ibigay ng Espiritu sa inyong pastor o sa ibang Cristianong puspos ng Espiritu ang pahayag ng karunungan o kaalamang kailangan mo. O kaya'y darating nang tuwiran sa iyo ang pahayag na ito bilang isang masidhing pagkadama o pagkaunawa. Bigla mong mauunawaan ang kalooban ng Dios para sa isang pangyayari. Dumarating ang kapahayagan ng tungkol sa kahulugan ng isang talata at ang bisa nito sa iyong suliranin. Binibigyan ka ng Dios ng pananalitang dapat sabihin sa taong nangangailangan ng tulong.

Kapag sinabi mo sa mga tao ang tungkol sa Panginoon o nagturo ka ng Biblia, kailangan mo ang pag-aakay ng Espiritu Santo. Kailangan ng mga magulang ang karunungan mula sa Dios upang mapayuhan nang tumpak ang kanilang mga anak. Ang gawain ng Espiritu Santo ay para sa pang-araw-araw na pamumuhay, hindi lamang kung may krisis.



Efeso 1:17. *"Ipagkaloob sa inyo ... ang Espiritu ng karunungan."*


Exodo 35:31. *"At Kanyang pinuspos siya ng Espiritu ng Dios tungkol sa karunungan, sa pagkakilala, at sa kaalaman, at sa lahat ng sari-saring gawain."*

Ang hula, pagsasalita ng mga wika, at ang pagpapaliwanag ng mga wika ay mga paraan ng pagsasalita ng Espiritu Santo sa kapulungan. Ang hula ay pahayag ng Dios sa pananalita ng tagapangaral. Maaaring ito'y pagsasabi ng mangyayari sa hinaharap; O pahayag na magpapatibay at tutulong sa mga nakikinig. Kung minsan, ang pahayag ay naririnig sa mga wika at ipaliliwanag sa wikang nauunawaan ng mga nakikinig. Ang paglalakip ng dalawang kaloob na ito'y tulad ng kaloob na hula.

Takot sa mga kaloob ng Espiritu ang ibang tao, sapagka't nakabalita na sila ng bulaang pahayag. Ito'y parang pagtangga sa salapi sa takot na makakuha ng

huwad. Laging sinisikap ni Satanas na guluhin ang mga tao sa pamamagitan ng paggaya sa gawain ng Dios. May mga bulaang propeta noong panahon ng Biblia at kahit ngayon. Subali't ang iyong Kaibigan, ang Espiritu Santo ay nagnanais na huwag mong tanggihan ang mga kaloob Niya sa iyo dahil lamang sa takot mong magkamit ng huwad o panggagagad ng Kanyang gawain.

At hindi rin nais ng Dios na madaya ka ng mga panghu-huwad. Kaya nga, isa sa mga kaloob ng Espiritu Santo ay ang pagkilala sa mga espiritu; ito ang nangangalaga sa iglesya laban sa masasamang espiritu at maling paratang ng iba. Naipagkakamali kung minsan ng mga tao ang sariling haka-haka bilang kapahayagan ng Dios. Dahil dito, naghahatid sila ng kaguluhan at kalituhan, sa pagsasabi nila sa iba kung sino ang dapat pakasalan, saan dapat magtungo, at ano ang dapat gawin. Kaya't ang sabi ng Dios, subukin natin ang lahat ng pahayag.



1 Tesalonica 5:19-22. "Huwag ninyong patayin ang ningas ng Espiritu; huwag ninyong hamakin ang panghuhula. Subukin ninyo ang lahat ng bagay; ingatan ninyo ang mabuti. Layuan ninyo ang bawa't anyo ng masama."


Ang mga pahayag na mula sa Espiritu Santo'y sumusunod sa limang pamantayan:

1 *Ang pahayag ay lubos na sumasang-ayon sa Salita ng Dios.*

Halimbawa, kung sinasabi ng pahayag na kunin ng isang lalaki ang asawa ng iba, ito'y hindi galing sa Espiritu Santo. Tumutulong sa atin ang Espiritu Santo upang sundin ang Dios. Ang pagsang-ayon sa Salita ng Dios ang pinakamahalagang pagsubok; lahat ay dapat subukin ayon dito.

2 *Ang pahayag ay dapat maging totoo.*

Kung hindi totoo ang sinasabi sa pahayag, hindi ito mula sa Espiritu Santo, sapagka't Siya ay ang Espiritu ng katotohanan. Ang mga panghuhulang mula sa Panginoon ay nangatutupad.



Jeremias 28:9. "Makikilala nga siyang propeta, na tunay na sinugo ng Panginoon, pagka ang salita ng propeta ay mangyayari."



Deuteronomio 18:21, 22. "At kung iyong sasabihin sa iyong puso: Paanong malalaman namin ang salita na hindi sinalita ng Panginoon? Pagka ang isang propeta ay nagsasalita sa pangalan ng Panginoon, kung ang bagay na sinasabi ay hindi sumusunod ni mangyari, ay hindi sinalita ng Panginoon ang bagay na iyon: ng propetang yaon ay nagsalita ng kahambugan, huwag mong katatakutan siya."



3

Ang pahayag ay dadakila kay Cristo.

Dinadakila ng Espiritu ng Dios at ng Espiritu ni Cristo, ang Ama at ang Anak.



Juan 16:14. "Luluwalhatiin Niya Ako."

1 Corinto 12:3. "Wala sinumang nagsasalita sa pamamagitan ng Espiritu ng Dios ay nagsasabi, si Jesus ay itinakwil, at wala sinuman ay makapagsasabi, si Jesus ay Panginoon kundi sa pamamagitan ng Espiritu Santo."

4

Ang pahayag ay naghahatid ng pagpapala, hindi ng kaguluhan.




1 Corinto 14:3, 4, 26. "Datapuwa't ang nanghuhula ay nagsasalita sa mga tao sa ikatitibay, at sa ikapangangaral, at sa ikaaaliw ... gawin ninyo ang lahat ng mga bagay sa ikatitibay."

5

Siya na nagbibigay ng pahayag ay may kamalayan at pananagutan na ang lahat ng bagay ay gawin sa maayos na paraan.

Ginagaya ni Satanas ang gawain ng Espiritu Santo. Sa espiritista, ang tinatawag na "medium" ay nawawalan ng malay at di alam ang kanyang sinasabi sapagka't supil siya ng ibang espiritu. Nguni't kapag nagsalita ang Espiritu Santo sa pamamagitan ng isang tao, alam ng taong ito ang nangyayari. Makapagsasalita siya at makatitigil upang hindi niya mahadlangan ang pahayag ng Dios sa pamamagitan ng pastor o ng iba. Malinaw itong itinuturo ni Pablo sa 1 Corinto 14. Dapat udyukan ng pastor ang mga kaanib na magsigamit ng mga kaloob ng Espiritu. Nguni't kailangan ding tiyakin niyang lahat ay nasa ayos. Kaya't

dapat kilalanin ng mga may kaloob ng Espiritu ng pangunguna ng pastor at huwag damdamin ang kanyang mga tagubilin at payo.

 1 Corinto 14:32, 33, 40. "Ang mga espiritu ng mga propeta ay nasasakupan ng mga propeta. Sapagka't ang Dios ay hindi Dios ng kaguluhan, kundi ng kapayapaan. Datapuwa't gawin ninyong may karapatan at may kaayusan ang lahat ng mga bagay."

Gawin Mo Ito


11. Isaulo ang 1 Tesalonica 5:19-22.
12. Isaulo ang limang pamantayang gagamitin sa paghatol kung ang pahayag ay mula sa Dios.
13. Nadarama mo bang kailangan ang mga gawa ng Espiritu Santo sa larangan ng mga kaloob na nasasaad sa 1 Corinto 12? _____
14. Kumikilos ba sa inyong iglesya ang mga kaloob na ito? _____
15. Nais mo bang magkaroon ng kaloob na espirituwal? _____

Idalangin ito.

INAAKAY KA SA PAMAMAGITAN NG MGA PANGITAIN AT PANAGINIP

Nabasa mo sa Biblia kung paanong nangusap ang Dios sa mga tao sa pamamagitan ng pangitain o panaginip. Nangungusap pa rin ang Espiritu sa ganitong paraan. Nangyayari ang hula ni Joel.



 Gawa 2:17. "At ang inyong mga binata ay mangakakakita ng mga pangitain, ang iyong mga matatanda ay magsisipanaginip."

Noong 1940, isinulat ni B. T. Bard ang tungkol sa kahanga-hangang pagbubuhos ng Espiritu sa Peking:

Nagkaroon ng pagtatapat ng mga kasalanan at

pagkukulang, pagsasalita sa mga wika at pagbibigay-kahulugan, panghuhula, panaginip na espirituwal, makalangit na pangitain tungkol kay Cristo at sa maluwalhating bayan, banal na pagpapagaling, at higit sa lahat, diwa ng pananalangin, pagsamo, at pagsamba.

Sa kaibuturan ng kanyang puso, pinakananasa ni Kao Chu Ju ang presensiya ng Dios, nguni't natatakot siyang makita ng kapwa, o patungan kaya ng kamay. Bigla niyang nakita sa isang pangitain si Jesus, na maingat na ipinatong sa kanyang ulo ang mga Kamay na pinaglagusan ng pako. Nabuwal siya sa sahig, sa ilalim ng kapangyarihan ng Espiritu Santo, at di-nagtagal ay maluwalhating nagsasalita ng ibang wika sa udyok ng Espiritu Santo.

Nakaaantig na mabuti sa isang tao ang mga panaginip na mula sa Dios. Marami ang binalaan sa pamamagitan ng panaginip upang talikdan ang kasalanan at tumanggap ng pagpapala, tulong, at pampasigla mula sa iyong panaginip. Dili kaya'y aakayin ka ng Espiritu Santo na idalangin o babalaan ang isang nasa panganib.

Karamihan sa mga panaginip ay hindi kapahayagang mula sa Dios. Patuloy na gumagawa ang iyong isip habang natutulog ka at hinahabi sa panaginip ang iyong isipan. Gayunman, mapakikilos mo sa iyong kapakinabangan ang mga panaginip na ito. Gawin mong isang pagunita upang idalangin ang sinumang napanaginip mo.

Gawin Mo Ito

16. Nangungusap pa ba ngayon ang Dios sa pamamagitan ng mga panaginip? _____
17. Karamihan ba sa panaginip ay kapahayagan mula sa Dios o mga bunga ng isip? _____
18. Kapag nanaginip ka, subukin ito: Bago ka matulog, sabihin mo sa Panginoon na nais mong maging malapit sa Kanya, kahit sa panaginip. Sa sandaling magising ka, idalangin ang mga taong napanaginipan mo.

INAAKAY KA SA PAMAMAGITAN NG MGA PANGYAYARI AT MGA PANINIWALA

Nakalampas ang bus na sasakyan ng isang Cristiano. Pagkalipas ng apat na oras, sumakay siya sa sumunod na bus, at nakatabi ang isang babaing nangangailangan sa Dios, na naakay niya sa Panginoon. Nanguna sa mga pangyayari ang Espiritu Santo.



Wari bang pinid sa harapan mo ang mga pinto ng pagkakataon? Lumingon ka. Maaaring binubuksan ng Espiritu Santo ang ibang pinto na may ibayong pagkakataon

para sa iyo. Alalahanin mo ang mga unang Cristianong tumakas mula sa Jerusalem. Saan man sila magtungo'y ipinahahayag nila ang ebanghelyo at naliligtas ang marami. Si Pablo'y hindi makahayo sapagka't napiiit, datapuwa't habang nasa loob ng piitan, kanyang sinulat ang karamihan sa mga liham niyang mababasa natin sa Bagong Tipan.

Napakahirap ba ng mga pangyayari sa paligid mo? Marahil, inilagay ka riyan ng Dios upang ikaw ang makalutas sa mga suliranin. Patulong ka sa Espiritu Santo upang malaman mo ang dapat gawin. Maging mapagmasid at masikap na gumawa upang mapabuti ang kalagayan sa paligid mo. Ikaw ay isa sa mga ilawan ng Dios. Huwag idaing ang kadiliman. Magliwanag saan ka man naroon.

Kadalasa'y aakayin ka ng Espiritu ayon sa pananalig mo sa Kanya, upang makapagpasiya ka nang tumpak. Kapag may nais kang gawin, nakadarama ka ng kapayapaan kung yaon ang tumpak. Nguni't kapag inisip mo ang ibang hakbang, nababagabag ka.

May reserbasyon sa isang eroplano ang isang mangangalakal na Cristiano, nguni't bagabag siya tungkol doon. Habang iniisip niya ito, lalo siyang naliligalig. Ipinagpaliban niya ang paglipad. Ang eroplanong una niyang binalak na sakyan ay bumagsak, at namatay ang lahat ng sakay. Iniligtas ng Espiritu Santo ang kanyang buhay.



Kawikaan 16:9. "Ang puso ng tao ay kumakatha ng kanyang lakad; nguni't ang Panginoon ang nagtutuwid ng kanyang mga hakbang."

Nagmamadali patungo sa isang pakikipagtipan ang isang pastor, nguni't may nadama siyang antig, "Kumatok ka sa bahay na iyon." Iniwaksi niya ito nguni't sumisidhi. Kaya't bumalik siya at umakyat sa naturang bahay. Natagpuan niya roon ang isang Cristianong nangangailangan ng tulong.

Nadama naman ng isang Cristiano ang udyok na dumalaw sa isang kaibigan. Pagsapit doon, nasumpungan niyang magpapakamatay na ang kaibigan niya. Naakay ng Cristiano ang kanyang kaibigan upang tanggapin si Cristo at ito'y naligtas.



"Sinabi sa akin ng Panginoon na dalhin ito sa iyo," wika ng isang lalaki habang iniaabot ang basket ng mga groserya sa isang pastor. Matagal na palang nananalangin ang pastor at ang kanyang ginang na ipagkaloob ng Dios ang kanilang pangangailangan sapagka't wala silang salapi o pagkain man.

Ang buhay ay nagiging kawing ng kasiya-siyang pakikipagsapalaran kung ikaw'y puspos ng Espiritu Santo at sumusunod sa Kanyang pamamatnubay. Aakayin ka ng Espiritu Santo sa buhay na lubhang mapakinabang at mapagpala.

Gawin Mo Ito

19. Ibig mo bang sabihin sa iyo ng Espiritu Santo ang iyong gagawin?

Hingin sa Kanya tuwing umaga sa buong linggong ito na akayin ka sa sinumang nais Niyang tulungan mo. Asahang ito'y gagawin Niya at sumunod ka rin sa Kanya.

20. Masasambit mo ba ang Galacia 5:16, 25; Awit 119:9; 1 Tesalonica 5:19-22?

MAKAKAMIT BA NATIN ANG BAUTISMONG ITO NGAYON?

Huwag mong itanong kung “Makakamit ba natin ang bautismong ito ngayon?” *Wala tayong silbi kung wala ito.* Ang Cristianismong walang Espiritu Santo ay balat lamang, isang magandang anyo, nguni’t walang sigla, *patay*. Tanging ang Dios, ang Espiritu Santo, ang Siya lamang makapagpapasigla – makapagbibigay ng maalab na apoy na bumubuhay.

Kung kailangang-kailangan ko kaya ang kapangyarihang ito, ipagkakait ba sa akin ng Dios, kahit ko ganapin ang kondisyon na hinihingi Niya? Ang Biblia ay punung-puno ng pangako at pangaral upang ako’y lumapit sa Dios na may lubos na pagtitiwalang tatanggapin ko ang pangako. Walang anumang badya na ipagkakait Niya ito.

Ang ating Tagapagligtas, maliwanag na pinatutunayan ng Kasulatan, ay nagbayad sa halaga ng handog na ito para sa atin. Ito’y mahalagang sangkap ng ganap na ebanghelyo. Wala nang iba pang badya sa Bagong Tipan.

Sinabi ni Jesus na higit na makabubuti sa Kanyang bayan ang sila’y mapuspos nito, kaysa Siya ay manatili sa kanilang piling. Ganyan kahalaga ang Bautismo ng Espiritu Santo sa mananampalataya. Ito’y ipinangako sa lahat ng mananampalataya sa lahat ng panahon.

Bayaan mong sabihin ko ito sa iyo nang buong paninindigan! Papananagutin ng Dios ang bawa’t mananampalataya sa anumang maaaring nagawa sana niya para sa kaharian ng Dios kung kanya lamang sanang tinanggap at ginamit ang kaloob na ito! Ang handog o kaloob na Bautismo ng Espiritu Santo ay nakalaan sa iyo upang iyong gamitin ngayon!

-Hinalaw mula sa *The Holy Spirit Is For You*, ni Ebanghelista C.M. Ward, ng Revivaltime. © 1966 Assemblies of God, Springfield Missouri 65802.